

Sekati Tamban, Secekak Bayam Dalam Bakul Rotan

Pasar becak itu nun jauh dari rumah
berjalan kaki sepiantas mungkin memegang bakul rotan
genggam duit seringgit erat-erat takut tercicir
nanti mak marah makan tak berlauk
sambil berjalan hafal darab sembilan
takut cikgu marah periksa ilmu hisab dapat dakwat merah
jalan tepi longkang besar lihat air melimpah ke tebing
malam semalam hujan lebat, longkang kecil tersumbat
sampah sarap, papan, kayu, tilam bantal, anjing, kucing
terbongkang hanyut di bawa arus terus ke laut.

Cepat kaki berselipar melangkah ke pasar sekejap lagi nak ke sekolah
besar nak kerja apa mak bapak tak kisah
asal tahu baca, tahu tulis, tahu kira, cukup sudah
jangan nanti buta huruf mak bapak dipersalah
lepas sekolah menengah, kerja kilang pun ada juga faedah
cukup umur moga ada orang masuk memining
sebelum muka mak bapak terconteng arang
cukup setahun kawin, anak sudah ditimbang
kalau sudah rezeki tuhan bagi, janganlah bimbang
mudah hidup orang dulu tidak banyak simpang perinang
sekati ikan tamban, secekak sayur bayam satu kebahagiaan.

Golden Point Award 2019
Malay Poetry – First Prize
Sekuntum Bunga Kecil Biru Di Landasan Kereta Api Tanah Melayu
(*A Little Blue Flower on the KTM Railway Track*) and other poems by Hartinah Ahmad

Tersedar dari lamunan di dalam restoran hawa dingin
melihat anak cucu meratah '*prosperity fish burger*' dan '*lettuce salad*' penuh nikmat
dan semangat
kisah sekati ikan tamban secekak sayur bayam dalam bakul rotan
kini tinggal dalam lipatan kenangan
doa siang malam generasiku hidup bahagia
dalam kancah helah dunia penuh pancaroba.